



Manual per ina dumonda da contribuziun per programs e projects per il rinforzament da la promozion da la sanadad e da la prevenziun en scola

L'Uffizi da sanadad po vegni dumandà per in sostegn finanzial. Previs èn projects u programs che vegnan realisads cun classas u en chasa da scola e che contribueschan al rinforzament d'ina moda da viver sauna da scolaras e scolars.

Per integrar la promozion da la sanadad e la prevenziun en scola, distinguain nus duas pussaivladads:

- Promozion da la sanadad è in process cumplessiv che entschaiva sin differents niveis en il context da la scola. Ils **programs da scola** che vegnan purtads en il cas ideal da l'entira scola e vegnan realisads sur plirs onn persequiteschan quest access.
- **Projects** èn limitads temporalmain (p.ex. dis da project) e pon vegnir realisads da singulas u pliras classas u schizunt sur ils stgalims ora. Era en questa categoria tutgan inputs tematicc a chaschun da sairas da geniturs e visitas en l'instrucziun dad experts spezialisads e da referents externs. Projects duain vegnir integrads en il program da scola e/u en l'instrucziun cun ina preparaziun ed ina reflexiun correspundenta.

Ultra da porscher in accumpagnament spezialisà e/u persunas spezialisadas adattadas, sostegna l'Uffizi da sanadad finanzialmain tant l'introducziun d'in program da scola sco era la realisaziun da projects. Oravant tut tar l'introducziun d'in program da scola (per il solit intensiv per quai che reguarda temp e custs) èsi recumandabel da prender si ordavant contact telefonic cun l'Uffizi da sanadad. Per ina meglia legibilitad duvrain nus oravant tut la nozun "project" e manegiain adina domaduas categorias, sch'i n'è betg formulà auter.

Criteris per il dretg da contribuziuns

Il dretg da survegnir contribuziuns han projects che van a prà cun la strategia da l'Uffizi da sanadad e che adempleschan ils criteris. Ils meds finanzials che stattan a disposiziun per projects en il sectur da la promozion da la sanadad e la prevenziun èn limitads. Las dumondas vegnan tractadas tenor lur entrada. En il senn d'ina finanziaziun da partenza vegnan novs projects tractads da maniera prioritaria en cumparegliazion cun projects che sa repetan. I na dat nagin dretg per daners da subsidi.

Cundiziuns formalas

- Ina dumonda sto vegnir inoltrada **cumpletta almain in mais avant l'entschatta dal project**, resp. dus mai avant l'entschatta dal program. Cun ina resposta po vegnir quintà entaifer traís resp. sis emnas. **In sustegn finanzial retroactiv n'è betg pussaivel.**
- Suenter la realisaziun dal project èsi da tramerter ina curta **documentaziun finala ed in rendaquint detaglià** a l'Uffizi da sanadad. Sin basa da questas indicaziuns succeda il pajament.

→ Ils formulars correspundents chattais Vus [qua](#) per il download

Chaussas essenzialas:

- Il project po vegnir attribuì ad in da noss secturs tematics.

Secturs tematics da la promozion da la sanadad:

➤ Moviment e nutriment

Il project ha la finamira da francar il moviment e/u il nutriment saun en il mintgadi (da scola).

➤ Resursas e cumpetenzas da viver

Il project serva al rinforzament da las cumpetenzas da viver da scolaras e scolars, persunas d'instrucziun e/u d'ulteriur(a)s collauratur(a)s da scola, per ch'i possian dumagnar cun success las sfidas da la vita.

➤ Prevenziun da dependenza

Il project intermediescha savida davart substanzas da dependenza e/u davart il cumportament da risico.

➤ Promozion da la sanadad cumplessiva

Il project gida da concepir la scola sco ambient da viver saun nua che tut ils acturs sa participeschan da maniera activa ad ina convivenza communabla positiva.

→ Detagls en la [Broschura «Gesundheitsförderung und Prävention in der Schule»](#) p. 5

- Il project vegn realisà en il chantun Grischun resp. la populaziun grischuna stat en il focus sco gruppa en mira.
- La gruppa en mira tutga tar il context da scola extendi (SeS, PI, DS, geniturs ed ulteriuras persunas spezialisadas per la scola)

Finanzas

- Las contribuziuns da l'Uffizi da sanadad cuvran maximalmain 50% dals custs totals e na muntan per regla betg a passa 10'000 CHF.
- Sch'i n'è betg fixà autramain, vegn il pajament fatg suenter avair examinà ils documents finals (documentaziun finala e rendaquit detaglià). Las finamiras dal project descrittas en il plan dal project ston esser cuntanschidas.
- La summa concedida sto vegnir impundida exclusivamain per il project menziunà. Meds finanziars betg duvrads ston vegnir restituïds resp. na vegnan betg pajads or.

Criteris d'exclusiun

Nagin sustegn finanzial da vart da l'Uffizi da sanadad na survegnan:

- Dis da sport e champs da sport annuals
- Excursiuns d'atun e da primavaira annualas
- Material da moviment e d'instrucziun per la piazza da pausa e la stanza da scola
- Projects da caracter commerzial
- Occurrentzas finanziadas parzialmain gia cun daners da G+S
- Projects che survegnan sustegn finanzial dadauter uffizis chantunals
- Projects che stattan en conflict cun activitads da l'Uffizi da sanadad u da ses partenaris

Voss conatct

Romana Sutter

Manadra da project per la promozion da la sanadad en scolas

+41 81 257 64 05, Romana.Sutter@san.gr.ch